

Pauro peba owera ie Iesu urubia aboto Epesesi sabowa ato na-irowomidirotiti

Kamade owera Epesesi urubia aboto

¹ Mo masiro Pauro ie, nedi peba titi owera ro mo ro nisioidiro. Mo Godi ro nohodowa-ro Iesu Keriso ro kotiodorai dubu to ararasoro ri.

Godi edi tarena urubia ro Epesesi sabowa ato na-orowomidiro, nedi peba titi ro nio aboto nimeiriai. Iesu Keriso gabo ato koko se etio ro iromowotoi-dumo, io nio nou se ie.

² Wisa tato nirimagare, miro mutu nimo Abera Godi aboudo na-ororuwotiti-die, ibose Abera Naramu Iesu Keriso nou aboudo, nio abato aise ba-miamotiti.

Urío kiwarebai Keriso aboudo ie

³ Abera Naramu Iesu Keriso nou edi abera ro Godi nouse ie. Nimo ro nou se memowabu-rimo. Nimo nou ro korosa ta-nimia-ro Adiri sabowa rido nimo urio iwarebai-ri imese sirio meamea tanaro to. Nimo Godi ro Iesu aboto ta-nidabuai, ina meana nimo aboto nou ri iaiwotiti-die.

⁴⁻⁵ Iedi meamea tanaro ro nimo aboto nou ri ou-diomo, mabu nimo Godi ro keba ia se nirapoi-ro, nou tarena urubia to ararasoro ri. Sodu duriomoro ido to gosioidiro, nimo nou ro tau se nirapoi-ro nou urubia to ararasoro ri, ibose Godi sosoro gabo ato mea se orowomidiro ri ubauba tato se. Godi ro nimo sapuwo to gabo keba ia se gosioidiro, nimo nou ro simara ia

merebusere to nou ri niapoi, mabu nu auna nirimagare ie nimo aboto. Iesu Keriso ro edi gabo ro gosioidiro Godi kamade ta-goi, nou ubi neito gowamo.

⁶ Ina nou do ie Godi nimo ro aise kemowabu modobo ia ie, nou ro edi auna ia wisa tato nirimagare ro nimo aboto ta-gaiwai-ro. Nu edi kaupoti nirimagare ia mere ro nou ro tanaro na-gosioidiro, iedi meana ro nou aboudo orororuotiti-die.

⁷⁻⁸ Mabu Iesu Keriso edi karaburai ro na-garaburai, nimo nou ro karima to ta-niahodorai, taie nimo ubauba aboudo aise niapopo-ro. Nimo edi ubauba sirio ro nou ro aise giatopeamuti. Godi edi wisa tato nirimagare ro imese auna ia ie, nimo aboto momuo se wisa tato se aise gaiwai-ro. Nimo nou ro mea muro tanaro to korowomidiro ta-nimia-ro, ibose mea umoro ta-nimia-ro tanaro kieibimo sapuwo to.

⁹ Godi ro gabo kebase ta-gosioidiro, nou ro edi gabo ro nimo aboto nou gowapotai-ro. Nedi gabo ro Godi ro urubia aboto kebase owapotai pua, piro se owamotiti. Nedi gabo ro na-nowauti nou e, Godi ro edi gabo ro Keriso aboudo gosioidiro, nou ubi neito gowamo.

¹⁰ Iedi saiki ro nou ro na-gohodowa paeapaea nama-oi-ri, nou ubi tanaro nato aise amadimo-ororosioidiro-ri. Ina nou ubi tanaro ibo ie, Godi ro edi namabu sirio gisioidiro Adiri sabowa ato, sopu duriomoro ato na-iamo, nou ro kaupoti moro to nato amadi-iwou-ri, neio imese Iesu Keriso sairo mabu ato ama-iaremuti-ri ina nou ro ama-iauri-ri.

¹¹ Tanaro sirio na-irorosioi-di-ro-dumo io Godi ubi ato irorosioi-di-ro-dumo. Duriomoro ido to gosioi-di-ro nimo nou ro ta-nihodowa Iesu Keriso aboto idabu'ai ri, ibose nou urubia to ararasoro ri.

¹² Godi ro nedi tanaro ro nou mabu ato gisioi-di-ro nimo etio ro nimibiria-rimo kebase Iesu Keriso sapuwo to, nimo ro auna ia pupuwo Godi kemowabu modobo ie.

¹³ Nio ro morobise ower'a ta-girowidi-ro-rimo ibo, mea ower'a Iesu sapuwo to nio ro kimibiria ato nio Godi ro nato kiapopo ie ubauba aboudo. Nio etio ro imibiria-dumo, Godi ro isabuna nio abato ta-giwate. Nedi isabuna ro Tarena Urio nouse ie, nio nou ro iwapotai-di-ro-die ibo nio nou ro Keriso aboto ta-gidabu'ai. Tarena Urio sapuwo to Godi ro kebase ta-garo ibo nou urubia aboto amadi-emeiriai-ri,

¹⁴ nimo umoro koi aboto ibo nou ro edi na gimasogoro-ro, saiki ata nimo ro momuo se nato namadimi-imidai-ri.

Ina nou mabu ato ie nimo morobise to umoro ta-noi-rimo ibo, nimo Godi ro imese anama-iapopo-ri, nou do to ararasoro ri, womu tato womu tato aise anama-irowomidirotiti-ri. Nimo ro auna ia pupuwo ia Godi kemowabu modobo ie.

Pauro kararatoro ower'a ie eso ower'a mutu

¹⁵ Mo ro ower'a ti-nirowidi-ro ibo nio ro Iesu Keriso sapuwo to mea ower'a koko se torobidi-ro-dumo. Ibose Godi edi tarena urubia sirio ro nio ro nirimagare aise imatiti-dumo, ina noudo ie

¹⁶ mo ro sirio tau eso ower'a karo Godi aboto. Nio mo ro sirio tau aise nimaragoidirotiti, nio

Godi aboto nou ri niwapotaidiroititi kararatoro tau ato.

¹⁷ Nimo Abera Naramu Iesu Keriso edi na emowabutiti, mo ro nou aboto sirio tau aise niarotiti. Abera Godi imese auna ia dubu e. Nou mo ro a-nararatorotiti nio nou ro muro iwaititi rie, Tarena Urio iedi pupuwo ro neito. Ibose Godi ia nakara se orowapotaidiro rie nio keremiro ato, nio umoro auna neito iwai rie Godi sapuwo to.

¹⁸ Nio sapuwo to mo ro Godi aise nararatorotiti nio giropu mea se idobura ri. Ina Godi ro nio edi giropu ro nama-idobuti-ri, nio ro iato umoro amadimo-oi-ri ibo nio edi tanaro aboto na-gihodowa-ro, nio ro abora kamade mutu na-emotoi-dumo, imese meana ia maumo tanaro ie kimidai aboto. Ina ibose nio umoro amadimo-oi-ri ibo nou ia simara urubia nou imasogoro-die, saiki ata neio ro maumo ia tanaro nou amadimi-imidai-ri.

¹⁹ Ina ibose nio umoro amadimo-oi-ri Godi edi pupuwo korosa ro na-owamotiti imese auna ia ie, duriomoro urubia pupuwo mutu keremodobowa modobo pua. Nou edi pupuwo ro woko neito isioidiroititi nimo abato.

²⁰ Iedi atu pupuwo korosa ro Godi ro kohodowa dubu Iesu pamo rido neito ta-gowameai-ro. Iedi atu pupuwo korosa ro nou Godi ro tumodi sapuwo ato neito gowomi, abora eputa dubu to nou ro omidiro Adiri sabowa ato.

²¹ Nou ro ioudo iauri-die imese sowake urio sirio, ibose urio sirio eputa urio to edina ro iraratorotiti-dumo, pupuwo orora, arua pupuwo korosa mutu urio, neio imese Iesu Keriso ro sopu to iauri-die. Awawo masiro edi na orora ro

irobidiro-dumo, Iesu Keriso ro sopu to iauri-die abora, ina ido neio nou ro sopu to iaurititiwai-ri.

²² Imese imese tanaro Godi ro Iesu Keriso aboto giaiwai kiauri aboto. Nou simara urubia kiwarebai sapuwo to, Godi ro Iesu Keriso ta-gapoi imese tanaro sopu to iauri ri.

²³ Iesu simara urubia nou durupi ie. Iesu urubia keremiro Keriso aboudo imadetiti-dioumo, imese beda mutu namabu ro iamo erere moro ato, Keriso nouse ie keremiro nou ro imiotiti.

2

Iesu ro tanaro na-gosioidiro nimo Godi ro keremiro neito nimia

¹ Nio sapuwo to owera ibo ie, nio kebase Godi ubi tato tanaro na-isioidirotiri-mo, nio urio pamo urubia sosoro irobutiti.

² Iedi tau ro nato nio kimibiria tato urubia ro irowomidirotiti, sopu duriomoro durupi ubi tanaro nio ro nou isioidirotiri-mo. Ibose Satani, ubauba orora sirio toboro rido na-iaurititi-die, nio ro nou ubi tanaro aise isioidirotiri-mo. Etio ra Godi ubi tanaro na-ibeouti-dumo kisioidiro aboto, neio niro turi ato Satani ro ubauba woko aise isioidirotiri.

³ Nimo kebase neio sosoro ta-nirowomidirotiti ubauba tanaro aise nisioidirotiri-mo, ibose durupi ubi tanaro ubauba kimaragoidiro mutu aise nisioidirotiri-mo. Arua urubia beda sosoro irowomidirotiti nimo neio sosoro ta-nirowomidirotiti. Godi auna serawo ro owatititi nimo aboto, mabu nimo giropu imese ubauba ie, ina nou ro ta-nimowapotai-ro ibo

nimo nou ro ubauba wisa anamadi-imia-ri
simara ubauba tanaro sapuwo to.

Morobise ie nimo edi ubauba tanaro sirio ro
na-nisioi dirotiti-mo nimo urio pamo ta-irobotiti.

⁴ Kaupoti nimo Godi ia ro natonato nimati-ro,
nou nirimagare imese auna ia ie nimo aboto.

⁵ Ina noudo ie nimo pamo urubia sosoro
na-nirobutiti nou ro nimo imese pamo rido
ta-niwagare-ro. Nimo Godi ro Iesu mutu pamo
rido atu se ta-niwameai-ro keremiro to.
Morobise ie, Godi edi wisa tato nirimagare ro
nimo aboto na-gaiwai-ro nou ro neito
niapopo-ro.

⁶ Nimo nou ro Iesu Keriso aboto ta-nidabuai,
ina nimo Iesu mutu Adiri sabowa ato ta-niwomi,
eputa urubia to ararasoro ri.

⁷ Godi ro idaibo tanaro gisioi diro ido paea se
imowawuti ri, ibo nu edi auna wisa tato
nirimagare ro imese morobise ia ie. Nimo Iesu
Keriso aboto na-nidabuai, Godi edi auna
natonato ro nimo aboto nato gowapotai-ro.

⁸ Morobise ia owera nou e, Abera Naramu
Godi edi wisa tato nirimagare ro nio ubauba
aboudo nou ro neito ta-giapopo-ro, nio ro
na-gimibiria-rimo. Nio nakara se karapopo ata
gabo tato ie, nedi kiapopo tanaro ro Godi ro
wisa tato se gosioi diro nio sapuwo to.

⁹ Ata dubu ata ro idaibo keremowabu owera
karo modobo ia pua, 'Mo ro meamea tanaro
na-nisioi dirotiti, mo Godi ro nou ri napopo-ro
ubauba aboudo.'

¹⁰ Nimo kimibiria urubia Godi ia ro nisioi diro.
Nedi tanaro ro Iesu Keriso ro na-gisioi diro nimo
Godi ro orio neito niwaititi, nimo ro meamea

tanaro kisioidiro aboto. Gabo nou ro kebase ta-nimesioidiro-ro nimo ro nedi meamea tanaro ro isioidiro ri.

Iesu na-garaburai, Iu oweru karo tato urubia, Iu urubia mutu nato gidabuai-ma

¹¹ Nio ro ma-dimaragoidiro-mo! Nio kebase daimodaimo urubia to irarasorotiti-mo. Ina Iu urubia ro nio sapuwo to ibo iarotiti-mo, 'Tedi urubia ro neio dubu simara takamai kiasio tato urubia ie.' Kaupoti nedi Iu urubia ro neio ro iedi tanaro ro na-isioidiro-titi-mo, tu to isioidiro-titi-mo, urubia dubu ohu durupi ato isioidiro-titi-mo.

¹² Kibase nio Keriso umoro tato ta-irowomidiro-titi, ibose nio Isiraere urubia aboto karadabuai gabo tato ie. Godi ro edi hodo ro na-isaubotiti-ro, Isiraere urubia aboudo se isaubotiti-ro, nio aboudo isaubo pua. Kibase nio ta-gimaragoidiro-rimo ibo meana Godi aboudo nimo aboto ororuwo-ri pua, Iu urubia aboto se gororuwo-ro. Nio edi tau ro nato Godi umoro imese musomuso ia se ta-irowomidiro-titi, ina noudo ie nio Godi aboto iwatutiti pua.

¹³ Kaupoti nio Iesu Keriso ro ta-gidabuai nou edi karima ro na-garawiriti nio nou ro neito giwosiomai-ro nou asesepu maumo to.

¹⁴ Mabu nou e, Iu urubia, Iu oweru karo tato urubia, nedi patu teibo ro neitiro abato miro Iesu Keriso ia ro gedeu, neitiro nou ro kaupoti to aise gidabuai-ma. Iu urubia, Iu oweru karo tato urubia, nedi patu teibo ro neitiro kebase serawo erereaurititi-do, ina neitiro mea se iroroworohutiti pua. Urubia patu teibo edi

tanaro ro giwasiai-ma, turi ato nou ro owamotiti.

¹⁵ Iesu Keriso durupi edi tau ato gaiwai, Iu urubia, Iu oweru karo tato urubia, edi korohoio tanaro ro na-iwasioirotiti-ma, nou ro aise gahuruti, taie nou ro aise gidabuai-ma kaupoti urubia to ararasoro ri. Iesu Keriso ro Mose edi sabi sirio ro idaibo mino to womu to imese giedea. Mabu Iesu ro edi tanaro ro na-gosioiroti, nu ubi ie urubia patu teibo idabuai-ma ri kaupoti urubia to ararasoro ri, nou abato aise iateiroti ri, ibose Iu urubia, Iu oweru karo tato urubia abato miro edea ri.

¹⁶ Iesu Keriso na-garaburai ota kemowotowa ato, nedi urubia patu teibo ro nasanasa to na-imidirotiti-do nou ro iedi korosa ro nato gagodo neitiro kaupoti to komidiro sapuwo to. Ina ata mabu nou e, nedi urubia patu teibo ro Iesu ro idabuai-ma rie Godi aboto.

¹⁷ Nio Iu oweru karo tato urubia Godi aboudo damodamo ia se na-gorowomidiro, ibose nimo Iu urubia Godi abato aupise na-norowomidiro, Keriso na-gou-ro nimo aboto atu se mea miro oweru nato nimowauti-ro.

¹⁸ Iesu Keriso ota kemowotowa ato na-garaburai ina noudo ie gabo modobo ia to aidiroti, Iu urubia, Iu oweru karo tato urubia, nimo atu se Abera Godi mutu keremowauti aboto. Nimo Tarena Uriro ro niwarebai-die nedi tanaro ro nou kisiidiro aboto.

Nimo etio ra Iesu urubia to na-nararasoro-dumo nimo Abera Naramu Tarena Moto ie

¹⁹ Ina noudo ie nio etio ra Iu oweru karo tato urubia to na-wararasoro-dumo, nio kebase gomo ato irohotiti-mo, nio moto goro ia to odoro

pua. Iedi tau ro nato nio Godi urubia to araratorotiti pua. Kaupoti nio abora ibo pua, nio abora Godi urubia ie. Nio idaibo kaupoti urubia ie, Godi simara ia tarena urubia mutu kaupoti to ta-gararapoi-do. Nio abora Godi moto urubia ie.

²⁰ Nio moto sosoro ie. Iesu Keriso ro kitiodorai urubia, Godi ipusu owera urubia mutu, iedi moto ro neio nou posi sosoro ie. Iesu ia nou se ie turimida posi,

²¹ nedi moto ro nou pupuwo ato itoititi, ibose iedi moto ro nou ro aise emogutiti. Ina noudo ie edi moto ro Abera Naramu edi tarena moto ro neito ararapoi-die.

²² Nio Iu owera karo tato urubia, Iu urubia mutu, nio moto kididi namabu sosoro ie Iesu ro na-idabutiti, nedi moto ro Godi edi Tarena Urio ro nou komidiro moro to ararapoi rie.

3

Pauro Godi ro gotiodorai Iu owera karo tato urubia aboto

¹ Ina noudo ie, mo, Pauro ie, Godi a-nararatorotiti nio sapuwo to. Mo dibura to nede-a-rimo, mabu mea owera Iesu Keriso sapuwo to nio Iu owera karo tato urubia nimowautiti.

² Morobise ie nio umoro ta-goi-rimo ibo mo aboto Godi ro edi wisa tato nirimagare ro gaiwai-ro nou woko emesioidiro ri. Nedi woko ro ibo ie nio Iu owera karo tato urubia aboto mea owera Iesu sapuwo to imowauti ri.

³ Urubia ro umoro koi tato owera piro se na-owamotiti, mo aboto Godi ro nou

gowapotai-ro. Nedi oweru ro nou sapuwo to dese to egea mere se niatiti.

⁴ Nio ro nedi peba titi ro neido namadime-eremoputi-ri, nio umoro nato oi rie ibo, Pauro nedi tanaro ro nou sapuwo to auna umoro mutu imidirotiti. Nedi umoro tato tanaro ro Iesu Keriso sapuwo to ie.

⁵ Urubia erere tau ato kebase na-irowomidirotiti, Godi ro neio aboto owapotai pua, piro se owamotiti. Godi edi Tarena Urio ro tanaro nou ro gewererio-ro, Godi edi tarena kitiodorai urubia ro neio aboto, ibose nou ipusu oweru urubia mutu.

⁶ Nedi oweru ro piro se na-owamotiti nou e, mea oweru Iesu Keriso sapuwo to Iu urubia, Iu oweru karo tato urubia ro na-girorowai-rimo, iedi soirio teibo ro Iesu ro kaupoti durupi aise gosioiido. Meana Godi aboudo na-woutiti-die neitiro ro atu se amadimi-imade-ri. Iedi oweru ro Godi ro kebase na-gowapotai-ro Iesu Keriso ro neio kiwarebai sapuwo to, nedi soirio teibo ro neitiro aboto atu se iedi oweru ro morobise to ama-ororosioiido-ri.

⁷ Godi edi wisa tato nirimagare ro mo neito nohodowa-ro nou sowake dubu to ararasoro ri, nu edi mea oweru ro Iesu Keriso sapuwo to urubia imowauti ri. Nedi woko ro mo ro na-nemesioiido, mo aboto Godi ro simara pupuwo to gaiwai-ro.

⁸ Godi edi tarena urubia ro neio dubu patu maumo ato, mo sopu ia to noroho-die. Mo ro ata tanaro kosoioiido modobo pua nedi woko ro korobai aboto. Kaupoti Godi ro gowapotai-ro nedi wisa tato nirimagare ro ina noudo ie nedi

woko ro mo aboto kowapotai Iu owera karo tato urubia imowauti ri. Iedi meana ro Keriso abato na-iamotiti-die maumo imese awawo ia ie, urubia ro simara umoro to kiwia modobo pua.

⁹ Godi edi gabo ro tuturu tau to nou abato piro se ta-owamotiti, ina Godi ro woko mo aboto gaiwai-ro nedi gabo ro paeapaea owaititi ri imese urubia aboto. Nou ro gisioihiro imese sirio nakomu.

¹⁰ Godi ro auna woko nu simara urubia aboto nato gaiwai-ro. Godi ro nedi gabo ro nou ri gosioihiro, pupuwo urio sirio toboro ato na-irowomidiroiti neio umoro iwai rie ibo Godi imese muro ia ie. Nou simara urubia kosioidiro ie nedi tanaro ro.

¹¹ Godi abato edi gabo ro piro se na-owamotiti-ro nimo Abera Naramu Iesu Keriso ro edi woko ro gosioihiro paeapaea neito gowai.

¹² Nimo abora kimibiria ti-niworohuti-dumo Iesu sapuwo to, nimo nou ro ta-nidabuai nou abato norowomidiro. Ina noudo ie abora nimo Godi sosoro gabo ato tere tato korowotoi.

¹³ Ina noudo ie nio mo ro a-nimagege, mo dibura ato na-noroho nou mabu ato, nio Iesu kowasoro aboudo ubi tato koi modobo pua. Modobo ie nio kamade ro kiwati nou sapuwo to, mabu nedi koko tau ro mo ro na-niaurititi, nio kiwarebai aboto.

Pauro ro Epesesi urubia sapuwo to ina gararatoro

¹⁴ Nedi mabu ro noudo ie mo kauhio to a-nomi mo ro Abera Godi a-nararatoro,

¹⁵ Adiri ato ibose sopu duriomoro ato erere gu urubia etio ro orowomidiro, neio edi keremiro ro Godi ro gimio-ro.

¹⁶ Mo ro nio sapuwo to Godi aise naranatorotiti, mabu imese meana nou abato iamotiti, modobo ie nedi meana ro nou aboudo nio nou ro maumo pupuwo kiwaititi, Tarena Urio edi pupuwo ro neito.

¹⁷ Mo ro Godi nou ri naranatorotiti Iesu Keriso nio niro turi ato aise omidiro ri nio kimibiria maumo ato. Ibose mo ro Godi a-naranatoro nio ro nirimagare tanaro aise isioidiro ri, nio koko se nato amadimi-iwotoi-ri, tumu obo ro iwaruria-ri pua.

¹⁸ Mo ro Godi ibose a-naranatoro nio ie, Godi edi tarena urubia sirio ro neio mutu, nio abato pupuwo korosa aise ama-owamotiti-ri nio keremasibawado aboto, ibo Iesu Keriso edi nirimagare ro imese boroboro ia ie, ibose womu tato ie.

¹⁹ Nedi nirimagare ro, urubia ro simara umoro to modobo ia pua momuo se kowea aboto. Kaupoti mo ro Godi a-naranatoro nou edi nirimagare ro nio umoro mea ia se amadimo-oi-ri. Idaibo tanaro namadimo-ororosiodiro-ri, nio Godi sosoro morobise to nato ama-irowomidiro-ri.

²⁰ Godi edi pupuwo korosa ro nou simara urubia abato pupuwo tanaro tororosiodiro-dumo. Ina noudo ie nou aboudo modobo ie imese sirio tanaro kisioidiro aboto. Nimo ro idaibo tanaro sapuwo to kimaragoidiro ata gabo ata owamo pua. Ibose nou sapuwo to kararatoro ata gabo ata owamo pua.

²¹ Urubia sirio ro Godi urubia na-iauri-dumo,

neio ro Godi edi auna pupuwo ro nou
ba-miauri-mo. Ibose urubia ro Iesu
na-iauri-dumo, neio ro Godi edi auna pupuwo ro
nou ba-miauri-mo. Ina noudo ie neio ro modobo
ie Godi womu tato womu tato aise kemowabu.
Ibose ba-mororosioihiro-mo.

4

*Iesu edi durupi ro nimo kimibiria urubia kaupoti
nou se ie*

¹ Mo ro Abera Naramu woko
na-nemesioihiro, dibura to nou ri
nede-a-rimo, ina nio mo ro binio to nou ri
nimediawado mea mino to korowomidiro aboto.
Godi ubi beda sosoro owamo-die nio edi urubia
ro na-girapoi mea se orowomidiro ri, nio idaibo
sosoro ba-dirowomidiro.

² Nio keremiro kiwabo maumo ato modobo ie
sirio tau keremowabu tato se korowomidiro,
mea miro keremaro tato korowomidiro, serawo
samo to koi tato modobo ie, tanaro sobosobo se
isioidiro mamu. Arua kimibiria urubia ro nio
aboto beda ubauba tanaro kisioidiro ra nio ro
ubauba to iwame mamu, nirimagare aise
gi-eremati-ri.

³ Nio imese kimibiria urubia Tarena Urio ro
kaupoti urubia to ta-girapoi, ina noudo ie miro to
ba-dirowomidiro arua kimibiria urubia mutu.

⁴ Nimo kimibiria urubia sirio kaupoti durupi
nou se ie, ina nimo niro turi ato atu Tarena Urio
ro imidiro. Nimo Godi ro na-nirapoi-ro nou
urubia to ararasoro ri, nou abato tiamo meamea
tanaro nimo ro atu se woki to ti-niauri-dumo
kororosioihiro aboto.

⁵ Nimo Abera Naramu kaupoti nou se ie,
kaupoti kimibiria gabo ato atu se noti

niwotoi-dumo, ina obo to kiwarumiauti tanaro kaupoti nouse ie.

⁶ Godi kaupoti nouse ie, ata pua ie, nu imese kimibiria urubia Abera ie. Imese sirio urubia nou ro iaurititi-die. Nu woko nimo keremiro maumo ato tisioidirotiti, ibose nu sirio kimibiria urubia abato imidirotiti.

⁷ Kaupoti Iesu Keriso nirimagare maumo ato nimo erere kimibiria urubia nou ro modobo ta-niwaititi-ro erere tanaro kisioidiro aboto.

⁸ Ina noudo ie Tarena Buka ro owera ibo aro-die, *Nou ohu to na-gioro, nou ro edi sarupo urubia ro giaubo, nu neio ro saro rido aise gobodoro-rimo. Taie urubia nou ro erere se nirimagare namabu nato gimio.*

⁹ Nedi owera ro 'Nu na-gioro' maumo beda sosoro owapotai-die? Maumo ibo ie, Keriso Adiri sabowa rido gororuwo-ro sopu duriomoro to, nou iato bobo to aise gedea-rimo.

¹⁰ Goto maumo to etu ro gimeseseba, iedi atu dubu ro nou ro gioro ohu ia toboro ohu to, imese moro ato omidiro ri.

¹¹ Nedi dubu ro nouse ie urubia modobomodobo nou ia ro iwaititi erere tanaro kisioidiro aboto. Arua urubia kitiodorai urubia to giapoi, arua urubia Godi ipusu owera urubia to giapoi. Arua urubia Iesu Keriso sapuwo to mea owera kimowauti urubia to giapoi. Arua urubia Iesu urubia kemeauri urubia to giapoi, ina arua neio Godi owera kitamudiro urubia to giapoi.

¹² Neio Godi ro ta-giapoi nou simara urubia imododiawado ri meamea kiwarebai tanaro kisioidiro aboto, ina Keriso edi durupi ro pupuwo owaititi ri.

¹³ Idaibo tanaro namadimo-ororosioi diro-ri, womu tato nimo kimibiria maumo ato kaupoti urubia to anamadima-ararapoi-ri, ina nimo imese Godi mere umoro atu se anamadimo-oi-ri. Ibose nimo ro mea mino to anamadimo-oromai-ri, momuo se modobomodobo anamadimo-oi-ri. Keriso beda sosoro imidirotiti mea ia se, nimo atu se idaibo sosoro anama-irowomidiro-ri.

¹⁴ Nimo ro iedi tanaro ro namadimi-isioi diro-ri, nimo ido merebusere kainakaina sosoro irowomidiro-ri pua. Pe utumo kainakaina beda sosoro ra gawia ra bukupu ra ro na-iwawodorowado-dumo, nimo idaibo iwawodorowado-ri pua. Io idaibo ie karasaubuti urubia oweri kirowidiro ato, bukupu ro ibo kiwodoro ie ina iato kiwosuruwo ie, karasaubuti urubia oweri na-iaro-dumo nimo idaibo orowati-ri pua. Gawia ra bukupu ra neitiro ro karasaubuti kitamudiro urubia imabuti-madie. Nedi urubia ro inaina ibo isaubutiti-dumo. Neio ro sirio gabo kisioidiro ie, ina sirio karasaubuti gabo kiwaibirio ie nimo kimibiria urubia bagea gabo kibodoro aboto.

¹⁵ Io nimo ro modobo pua idaibo oweri gare se kimedea. Nimo ro oweri arua urubia aboto karo ato nimo ro morobise oweri nirimagare mutu anamadima-aro-ri. Nedi tanaro ro namadimo-osioi diro-ri, nimo nato nama-iroromowado-ri erere tanaro kisioidiro maumo ato, Keriso sosoro nato anama-irowomidiro-ri. Momuo durupi Keriso eputa ie, nimo nou durupi ie.

¹⁶ Kimibiria urubia sirio nimo erere atemo ie. Ibose erere atemo durupi ato na-iamo woko

nato na-isioidiro-dumo nirimagare maumo ato,
edi durupi ro gamogamo Keriso ro kowaititi ie.

Orio keremiro to ba-dirowomidiro

¹⁷ Mo ro nedi umoro oweru to nama-aro-ri
Abera Naramu edi korosa ro neito nomia-ro nio
kimowauti aboto, ibo nio Godi umoro tato
urubia sosoro ina korowomidiro modobo pua.
Neio abato meamea tuputupu kimaragoidiro
iamo pua, imese poto ia ie.

¹⁸ Neio ro ubauba tanaro na-isioidiro-titi-mo,
neio kimaragoidiro patu duwoduwo ro
iatimotiti-ro. Godi edi keremiro muro ro neio
nakara se orowasiouti-dumo. Mabu neio
morobise umoro inaina aise ibeiouti-dumo. Neio
giropu imese akau ta-geremowaititi-rimo,

¹⁹ ina noudo ie morobise umoro neio abato
iamo tato. Kororodiobuti tato tanaro
na-isioidiro-titi-mo, imese siripo tato
ta-goititi-rimo. Nedi urubia ro neio siripo tanaro
edi pupuwo maumo ro neito ta-godoro-rimo.
Neio auna sogoi ro iwatiti erere mareamarea
tanaro kisioidiro aboto.

²⁰ Kaupoti nio ro Iesu Keriso edi kitamudiro
oweru ro nou sapuwo to idaibo tanaro nou
aratamudiro pua.

²¹ Morobise ie nio Iesu Keriso sapuwo to
oweru ta-girorowai-rimo, ina morobise
kitamudiro oweru Keriso abato na-owamotiti
nio ro ta-garatamudiro-rimo.

²² Nio kebase ta-garatamudiro-rimo ibo nio
tagara korowomidiro keremiro, tagara
mareamarea obotama sosoro ie, nio ro kipuruti
modobo ie. Nio kebase edi mino to
na-irowomidiro-titi, nio keremiro nakara se

ubauba irimowaititi-mo. Nio auna ubi na-iamotiti ubauba tanaro kisioihiro aboto, iedi ubauba ubi ro nio neio ro a-isaubutititi-mo. Iedi karasaubuti ubi ro neio ro nio keremiro ubauba imowaititi-mo.

²³ Nio ibose ta-garatamudiro-rimo orio kimaragoidiro mino,

²⁴ ibose orio keremiro kiroiti aboto, orio obotama kiroiti beda sosoro ra. Nedi orio keremiro ro Godi ro gosioihiro nou simara keremiro mino to, idaibo morobise tuputupu tanaro kisioihiro, imese mareamarea tato korowomidiro.

²⁵ Ina noudo ie karasaubuti tanaro marea obotama sosoro ie, nio ro ba-dipuruti-mo, borubi kimibiria urubia mutu morobise owera to gi-eremowauti-ri. Mabu nimo atu se Iesu Keriso durupi to nararapoi-ro.

²⁶ Oro serawo koi ato ata tanaro sapuwo to, oro nedi serawo ro nou ro ubauba to aise edea mamu. Iedi serawo ro oro abato na-owamo duwo ro asiai mamu, samo to gi-oporeai-ri,

²⁷ mabu oro ro idaibo Satani bobu kemagerai ie oro nou ro ubauba to owodoro rie.

²⁸ Piro urubia neio Iesu kowaoro urubia to na-gararapoi-rimo piro tanaro aise ba-mimeserai-mo, woko se ba-misioihiro-mo. Neio modobo ie mea woko kisioihiro simara tu teibo to, ina noudo ie meamea kiwarebai tanaro amadimi-isioidiro-ri namabu tato urubia aboto.

²⁹ Nio owera karo ato nio matagoro rido karakara owera osuwoduti mamu, meamea owera se gi-orowauti-ri neio pupuwo kimowaititi sapuwo to. Nio owera beda urubia ro imerewidiro-dumu, modobo ie meana nio

aboudo kimade, idaibo neio nio ro
amadimi-iwarebai-ri.

³⁰ Godi edi Tarena Urío ro kamade tato
owaititi mamó. Nou Godi ro gemeiriai-ro
isabuna ri nio niro turi to, ibo nio nou
merebusere ie ina nio nou ro ama-iapopo-ri
womu saiki ato.

³¹ Masawe kerereauri, serawo, masawe niro,
keremaro, masiro ubauba korowaititi, ubauba ia
kimaragoidiro arua urubia sapuwo to, nedi tau
ro nato aise diwagareawado-mo.

³² Kimibiria borubi aboto meamea tanaro aise
gidimi-isioidiro-ri, ibose nirimagare aise
gi-eremati-ri. Nio Godi ro ubauba tanaro sirio
ta-gimatopeamuti, mabu Iesu Keriso aboudo
orobu-die, nio aboto beda kimibiria borubi ro
isioidiro-dumo ubauba, neio edi ubauba ro aise
gi-imatopeamuti-ri Godi ro nio ubauba beda
sosoro gimatopeamuti.

5

Tuputupu se gi-orowomidiro-ri

¹⁻² Godi beda sosoro muro to imidiro-titi nio
modobo ie idaibo muro to korowomidiro. Mabu
nio nou merebusere ie, nirimagare nou ro auna
se imatiti. Nio ro tanaro sirio na-isioidiro-dumo,
iedi tanaro kisioidiro maumo ro nato, nio ro
modobo ie urubia nirimagare kimati. Iesu
Keriso ro nirimagare beda mino to giwawuti-ro
nimo aboto, ibose nimo sapuwo to simara
keremiro aise gadodorai pamo koweá aboto, io
urubia nirimagare idaibo mino to ba-dimati-mo.
Nou keremiro na-gaiwai nimo sapuwo to mea
nibo dehoró sosoro ie Godi aboto aiwai rie.

Idaibo Godi ra urubia ra turituri urubia ro sipisipi dawade na-imatowotiti-mo Godi aboto, io ibo ie.

³ Nio Godi urubia ie. Ina noudo ie piro tanaro isioidiro mamō, idaibo arua mamio dubu mutu oroho mamō, siripo tanaro isioidiro mamō. Ibose namabu sirio sogoi ro iwati mamō. Mabu Godi edi tarena urubia ro modobo ie idaibo tanaro kisioidiro tato korowomidiro.

⁴ Siripo mareamarea owerā to eremowauti mamō, ubauba sete owerā aro mamō. Owerā karo tau ato kimaragoidiro tato owerā to aro mamō. Mabu Godi urubia ro idaibo tanaro kisioidiro imese tuputupu tato ie. Modobo ie sirio tau eso owerā kamade mutu aise gi-aro-ri Godi aboto.

⁵ Nio morobise to umoro ta-goi-rimo ibo upo tanaro kisioidiro urubia, siripo tanaro kisioidiro urubia, namabu sogoi urubia, neio modobo pua Keriso Godi mutu neitiro edi kiwaboi maumo ro neito kodoro. Namabu sogoi urubia neio idaibo sosoro ie orora kiroru.

⁶ Nio ata dubu ata ro modobo pua kisaubuti, iedi ubauba tanaro kisioidiro sapuwo to. Mabu Godi owerā inaina etio ro ibeiouti-dumo, nedi ubauba tanaro sirio ro etio ro isioidiro-dumo, Godi serawo neio aboto tou-die neio ubauba wisa imio ri.

⁷ Ina noudo ie nedi ubauba tanaro ro etio ro isioidiro-dumo, neio aboto aise aradabu mamō.

⁸ Mabu nio keba se Godi edi morobise owerā ro umoro mea se oititi pua, duwoduwo maumo ato ta-waratowoutiti-mo. Kaupoti nio abora Abera Naramu urubia ie, nou edi pina woroworo ro nou ato toroho-dumo. Ina noudo

ie urubia Godi edi woroworo ro nato beda
sosoro korowomidiro ra, nio idaibo sosoro
ba-dirowomidiro.

⁹ Kimaragoidiro modobo ie ibo, urubia etio ra
Godi edi woroworo ro nato na-oroho-dumo, neio
mea se korowomidiro, idaibo meamea tanaro
kisioidiro, tuputupu tanaro kisioidiro, morobise
tanaro kisioidiro.

¹⁰ Umoro ba-doititi-mo Godi kamade beda
tanaro to kowaititi ra.

¹¹ Ubauba tanaro urubia ro duwoduwo
maumo ato na-isioidiro-dumo, neio aboto aise
aradabu mamu. Neio ro iedi dadudadu tanaro
ro na-isioidiro-dumo, nio ro paeapaea
ba-diwaititi-mo.

¹² Iedi ubauba tanaro ro iedi kimibiria tato
urubia ro piro se na-isioidiro-dumo, nio
kimibiria urubia ro idaibo tanaro sapuwo to
keremowauti ato, io nio siripo koi modobo ie.

¹³ Iedi ubauba tanaro sirio ro woroworo ro
paeapaea kiwaititi ato, urubia umoro nato koi ie
ibo ubauba tanaro ie.

¹⁴ Mabu imese tanaro sirio duwoduwo maumo
rido kiwosuruwo ato, woroworo to neio paea se
imese kiamo ie.

Ina noudo ie nimo kimibiria urubia ro, urubia
etio ra keremasibawado tato ibo neio ubauba
mutu e, neio sapuwo to nimo ro ohare kainai
kiwati ie. 'Nio norou na-irodu, direribua-rimo!
Nio pamo na-irodu, dorowameai-rimo! Ina
Keriso edi pina ro nio abato ama-imewia-ri.'

¹⁵ Ina noudo ie nio komidiro keremiro mea se
deremododai-mo. Muro tato urubia beda
tanaro isioidirotiti-dumo, idaibo mino to
orowomidiro mamu, muro urubia tanaro
gi-isioidiro-ri.

¹⁶ Tau mea se gi-owaboi-ri meamea tanaro se gi-isioidiro-ri, mabu nedi saiki ro nato urubia ro awawo ubauba tanaro aise isioidiro-dumo.

¹⁷ Ina nedi mabu ro noudo ie karatai tanaro aise isioidiro mamo. Modobo ie Abera Naramu ubi tanaro nio ro umoro koi ina nou kisioidiro.

¹⁸ Koko obo auna se idio mamo, mabu arua urubia neio koko obo kidio ato neio ro siripo tanaro aise kisioidiro ie. Kaupoti sirio tau Godi edi Tarena Urio ro nio ro ba-demaidodorawado-mo nio nou ro kiworohuti aboto.

¹⁹ Borubi kimibiria urubia mutu Ohare Tarena Buka ato na-iamo edi owera ro neito gi-eremowagomea-ri. Ibose Godi kemowabu ohare, arua ohare Tarena Urio ro na-imiotiti-ro, nio neito gi-eremowagomea-ri. Arua ohare Abera Naramu nouto gi-emowabu-ri morobise giropu mutu.

²⁰ Nio abato beda tanaro ro kororosioioidiro ra nio keremiro maumo ato, eso owera nimo Abera Godi aboto aise gi-aro-ri, Abera Naramu Iesu Keriso edi pupuwo masiro ro nouto.

Owera upi uramio sapuwo to ie

²¹ Nio komidiro maumo ato kimibiria urubia keba to gi-aremo-ri, nio marasio saro to kerewesiauti modobo ie, Keriso masiro auna kowaititi sapuwo to.

²² Upi simara uramio ubi tanaro keba to gi-aremo-ri, nio marasio saro to kerewesiauti modobo ie, nio ro Abera Naramu ubi tanaro keba to beda sosoro iaremotiti-dumo.

²³⁻²⁴ Mabu uramio nio eputa sosoro ie, nio neio ro iauri-dumo. Iesu Keriso nou simara urubia eputa ie, neio nou durupi ie. Mamio, Iesu

Keriso edi urubia sirio ro nou ubi tanaro keba to beda sosoro iaremotiti-dumo, nio ro imese tanaro sapuwo to simara uramio ubi tanaro keba to ba-diaremo-mo. Kimibiria urubia nimo Iesu durupi ie, nimo ubauba aboudo kiapopo dubu Iesu nou se ie.

²⁵ Uramio ina ata owera nio aboto ibo ie mo ro nou nama-imowapotai-ri, nio simara upi nirimagare ba-dimati-mo, idaibo Iesu Keriso ro simara urubia nirimagare beda sosoro imatiti. Neio sapuwo to simara keremiro orobidiro pua, aise gadodorai pamo kowea aboto,

²⁶ neio tarena iwai ri. Keriso ro simara urubia Godi edi owera ro nouto marea tato ta-giwai, ibose obo to ta-giwiouti.

²⁷ Keriso simara keremiro nou ri gadodorai nou pamo kowea aboto, nou edi urubia ro nou mea marete orobo to ararapoi ri, ina nou ia aboto owateai ri. Iedi marete orobo ro nou imese tarena ia ie, ata ubauba tato ie.

²⁸ Ina idaibo sosoro ie nio simara upi nirimagare aise gi-imati-ri, simara durupi nirimagare beda sosoro eremati-dumo. Nio upi nirimagare na-imati-dumo, nio nirimagare nakara se ibo eremati-dumo.

²⁹ Ata dubu simara durupi ubauba keremowai pua, nou ro mea mino to kemododiai ie, nou ro meamea ohona kiho ie, meamea obotama kiroiti ie. Idaibo sosoro ie Iesu Keriso ro nu simara urubia mea mino to iworohutititi.

³⁰ Mabou nimo kimibiria urubia sirio, Keriso durupi atemo ie.

³¹ Owera kebase Tarena Buka ato ta-gisioidiro-rimo ibo, *Urubia dubu nu simara*

*mamu ra abera ra kimeserai-ma ie orobo kedea
ato, neitiro kaupoti to kararapoi ie.*

³² Nedi tanaro maumo ro Godi ro urubia aboto
kebase owapotai pua, piro se ta-owamotiti.
Kaupoti nedi ower a maumo ro mo ro
a-nowapotai Keriso sapuwo to na-owamotiti,
nou urubia mutu.

³³ Ower a koporeai aboto, uramio, nio simara
upi nirimagare aise gi-imati-ri, nio simara
durupi nirimagare beda sosoro erematiti-dumo.
Ibose upi, nio simara uramio ower a aise
gi-irowidiro-ri.

6

*Merebusere, mamio, abeamio totomu nio sapuwo
to ie*

¹ Merebusere nio mamio abeamio ower a aise
gi-irowidiro-ri, mabu nio Iesu do ie, ina nou mea
tuputupu tanaro ie.

² Merebusere, *mamu ra abera ra mea mino to
gi-iauri-mari.* Mabu Abera Naramu keba sabi
kemasaubiai ower a mutu nou e,

³ *Nio ro idaibo sosoro tanaro
namadimi-isioidiro-ri, nio keremiro modobo ato
amadimi-iwaboi-ri, nio duriomoro ato tuturu tau
to ama-irowomidiro-ri, womu tato abeabe
nogenoge namadimo-oititi-ri.*

⁴ Abeamio, nio edi merebusere ro neio tanaro
sapuwo to, inaina auna se imadowere mamo.
Modobo pua neio niro turi nio ro serawo
kimowaititi. Modobo ie neio nio ro Abera
Naramu kitamudiro ower a to gi-itomu-ri, ibose
ubauba tanaro neio ro kisioidiro ato, wisa na

ba-dimotuputi-mo, neio edi kimibiria ro mea se kiroromai sapuwo to.

Wisa tato woko urubia, eputa urubia mutu, nio sapuwo to ie

⁵ Nio etio ra wisa tato woko na-isioidiro-dumo, nio edi eputa urubia ro nedi sopu duriomoro ro nato, neio ubi woko nio ro tere mutu aise gi-isioidiro-ri, woko kamade giropu mutu gi-osioidiro-ri. Nio Keriso ubi tanaro beda sosoro isioidiro-dumo, nio eputa urubia ubi tanaro idaibo sosoro ba-disioidiro-mo.

⁶ Arua wisa tato woko kimesioidiro urubia neio eputa urubia korowomidiro ato, neio ro woko mea se nato kisioidiro ie, neio kamade kiwaititi aboto. Kaupoti nio idaibo orowati mamu. Nio ro modobo ie sirio tau eputa urubia woko kamade giropu mutu mea se kimesioidiro. Nio Iesu Keriso wisa tato woko urubia ie, Godi ubi tanaro nio ro sirio tau mea se kisioidiro modobo ie.

⁷ Nio ro edi woko ro na-isioidiro-dumo kamade mutu gi-isioidiro-ri, ibo pua nio ro duriomoro urubia kamade kiwaititi sapuwo to kisioidiro. Kaupoti nio ro Abera Naramu nou kamade owaititi rie. Ina noudo ie iedi woko ro mea se gi-isioidiro-ri.

⁸ Mabu nio umoro ie saiki ata Abera Naramu ro meamea wisa ama-imio-ri etio ra meamea woko na-isioidirotiti-mo. Wisa tato woko urubia, ibose urubia simara woko na-isioidiro-dumo, neio atu se simara meamea woko sapuwo to meamea wisa amadimi-imade-ri.

⁹ Ina ata oweru ibo ie eputa urubia nio aboto, nio wisa tato woko etio ro imesioidirotiti-dumo,

neio ibose nio ro mea se ba-diworohuti-mo. Neio nio ro masawe to irubiautiti mamo nio ubi tanaro se kisioidiro aboto. Eputa urubia, nio simara eputa dubu ro Adiri sabowa rido tiauri-die, ina nio edi wisa tato woko urubia ro, nou ro ibose ioudo tiauri-die. Nedi owera ro ba-demaragoidiro-mo, nou ro urubia atu mino to kiworohuti ie.

Satani beda sosoro kemotobowa ra

¹⁰ Ina mo aboudo ie iana owera nio aboto, Abera Naramu edi pupuwo korosa ro nio neito ba-dirimowotoi-mo, ibose nou edi pupuwo ro nio aboto na-gaiwai-ro, iedi erapo ro neito ba-dirimusubuaui-mo.

¹¹ Godi edi urio boso namabu sirio ro, nio nou ro erere se ta-gimio, nouse diroiti-mo. Nio ro namadimi-iroiti-ri, Satani ubi na-iedea karasaubuti tanaro nio aboto isioidiro ri, neio aboudo nio edi boso namabu ro neito amadimi-irimusubuaui-ri.

¹² Mabu idaibo sosoro ie, nimo abora urio to boso abato noroho-dumo, kaupoti nedi boso ro nato paea urubia mutu orowati-ri pua, ubauba orora, neio eputa orora sirio, nimo neio mutu norowati-dumo. Nedi duriomoro gebari ro duwoduwo ro ta-gatimai, ina nedi duwoduwo ro neio ro oworohutiti-dumo. Ina neio arua toboro ato irohotiti-dumo. Nedi orora sirio ro erere moro ato na-irowomidiro nimo boso neio mutu e.

¹³ Ina nio mo ro nou mabu ato nimowapotai, Godi edi boso namabu sirio ro, boso koroho urubia sosoro diroiti-mo. Nio ro mea se kiroiti ato, nio aboto auna ubauba tau namadi-ou-ri, nio nou ro iwameduti-ri pua. Ibose iedi boso ro

womu to kereredeadea ato nio nou ro beda
kiwororuwo pua, nio koko se
amadimi-irimowotoi-ri.

¹⁴ Boso koroho dubu beda mino to
kirimowotoi ra boso urubia kiwamedei sapuwo
to, nio ro nedi tanaro ro nou ba-disioidiro-mo.
Urío boso namabu ibo ie, nio ro Godi morobise
owera koko se ba-diroiti-mo, boso koroho dubu
ro obotama bereito koko se beda sosoro
karatahirai ra.

Mea tuputupu tanaro ba-diroiti-mo, boso
koroho dubu hoko korowasiai namabu beda
sosoro kiroiti ra, nasa urubia aboudo neito
korowasio ie.

¹⁵ Ina mea miro owera Iesu sapuwo to tamaka
sosoro ba-diroiti-mo, boso koroho dubu tamaka
pikipiki se beda sosoro kiroiti ra nou
keremododiai aboto boso sapuwo to.

¹⁶ Ina ata owera ibo ie, nio edi kimibiria ro
Keriso sapuwo to koko se ba-dirobidiro-mo, boso
koroho dubu ro durupi korowasiai nakomu
koko se beda sosoro korobidiro ra. Ina boso
dubu ro era mio iona kipedu ato, nio ro nouto
kiagodo ie, nio takamai neio ro iwasomai-ri pua.

¹⁷ Ibose Godi edi kiapopo tanaro ro nio ro nou
aboudo koko se ba-dirarebidiro-mo, boso koroho
dubu koko ható beda sosoro keremedea ra,
eputa neito kowasiai ie.

Godi edi owera ro Tarena Urío edi boso giri ro
nio aboto na-gaiwai-ro nouse ie, nou
ba-dorobidiro-mo, boso koroho dubu ro boso
giri beda sosoro korobidiro ra.

Nedi tanaro sirio ro urío boso sapuwo to nio
ro nou se ba-disioidiro-mo.

¹⁸ Sirio tau Godi aboto erere muro to aise gi-araratoro-ri. Godi edi Urio ro nio nou ro kimasouti ie kararatoro tau ato. Ina noudo ie nio ba-diraroweauti-mo, modobo ie Godi aboto kararatoro tarena urubia sapuwo to, orodiobuti mamu.

¹⁹ Ibose mo sapuwo to sirio tau Godi aise gi-araratoro-ri, mo ro urubia beda owera kimowauti ra, mo ro karo owera nou ia ro kemasouti modobo ie. Mea owera Iesu Keriso sapuwo to mo ro arua urubia modobo pua tere mutu kimowauti. Urubia ro nedi owera ro Iesu sapuwo to kebase umoro koi tato, piro se ta-owamotiti.

²⁰ Mo Iesu Keriso woko dubu e, nou ro nohodowa-ro nou bobo ato urubia mea owera mo ro imowauti rie. Mo dibura ato nou mabu ato noroho sekere, kaupoti urubia mo ro nedi owera ro aise nimowautititi. Ba-dararatoro-mo mo ro urubia kimowauti ato Iesu Keriso sapuwo to, modobo pua tere mutu kimowauti. Abera edi ubi tanaro ro mo ro neito kosioidiro modobo ie.

Iana owera Pauro aboudo ie

²¹ Mo aboto edi tanaro ro ororosioiido-dumo, nio umoro koi sapuwo to, nio aboto mo ro nimo kimibiria neama nirimagare na-nemati-dumo a-nemeiriai, nu masiro Tikikasi. Nou ro mo sapuwo to nio umoro ama-iwai-ri. Nedi dubu ro Abera Naramu edi woko ro mea se emesioiido-titi. Nato beda tanaro ro ororosioiido-dumo mo borubi mutu, nio nou ro ba-mimowauti.

²² Mo ubi ie nedi dubu ro nio nou ro pupuwo ba-mimowaititi. Nedi tanaro teibo ro isioiido-mari Tikikasi nou mabu ato a-nimeiriai.

²³ Mo niramio, nimo Abera Godi, Abera Naramu Iesu Keriso mutu, neitiro edi miro ro nio abato aise ba-miamotiti. Ibose arua urubia nirimagare kimati giropu, kimibiria mutu, neitiro ro nio abato ba-miaremuti-do.

²⁴ Nimo Abera Naramu Iesu Keriso nirimagare etio ro womu tato se na-ematiti-dumo, Godi edi wisa tato kiwarebai ro neio abato ba-miamotiti.

Tareka Buka
Portions of the Holy Bible in the Bamu language of
Western Province, Papua New Guinea
Buk Baibel long tokples Bamu long Niugini

copyright © 2023 SIL Papua New Guinea

Language: Bamu

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2026-08-26

PDF generated using Haiola and XeLaTeX on 26 Aug 2026 from source files dated 26 Aug 2026

14d82267-f09c-5d69-a15a-8b9a709122b4